



**TERBAIK:** Perbarisan sebelum memulakan Majlis Tamat Latihan & Penyampaian Sijil Pentauliahan Inspektor Kor SUKSIS.



**TAHNAH:** Penyampaian anugerah pelatih terbaik dalam menjalankan latihan selama 3 tahun.

## 106 pelatih terima sijil pentauliahan Inspektor Kor SUKSIS Zon Borneo

UB 30.09.2022 P.06

**KOTA KINABALU:** Seramai 106 pelatih menerima Sijil Pentauliahan Inspektor Kor SUKSIS Zon Borneo baru-baru ini di Dewan Canselor, Universiti Malaysia Sabah (UMS).

Daripada jumlah tersebut, 68 pelajar adalah dari UMS sementara 38 pelajar dari Universiti Malaysia Sarawak (UNIMAS).

Mereka menerima sijil pentauliahan daripada Pesuruhjaya Polis Sabah, Dato' Idris Abdullah.

Menurut Idris, penubuhan Kor Sukarelawan Simpanan Polis Siswa Siswi atau Kor SUKSIS bertujuan untuk memberi pendidikan dan pendedahan latihan kepolisan kepada para pelatih di samping menjadi salah satu aktiviti kokurikulum utama dan penting di setiap universiti awam.

"Pelatih Kor SUKSIS perlu menjalani latihan selama 3 tahun atau 6 semester yang melibatkan 672 jam secara keseluruhannya, mengikut silibus latihan yang telah diselaraskan dan ditetapkan di semua universiti awam.

"Dengan adanya modul-

modul latihan yang ditetapkan seperti Modul Latihan Kawad, Modul Latihan Senjata, Modul Kursus Asas Pasukan Gerakan Am dan Modul Program Khidmat Masyarakat, pegawai-pegawai Kor SUKSIS diyakini mampu untuk menjadi seorang graduan yang memiliki kemahiran insaniah yang tinggi, sekali gus membentuk sahsiah cemerlang sebagai pemimpin berkaliber serta berpengetahuan dalam bidang kepolisan," katanya.

Beliau berkata demikian ketika menyampaikan ucapan sempena Majlis Tamat Latihan dan Penyampaian Sijil Pentauliahan Inspektor Kor SUKSIS Zon Borneo Tahun 2022.

Menurut Idris, negara sememangnya memerlukan generasi pemimpin yang berilmu, berbudaya cemerlang, bertanggungjawab, berwawasan, berintegriti dan mempunyai daya ketahanan yang kental serta bersemangat waja dalam melaksanakan agenda negara.

Justeru, beliau turut menyuarakan harapan agar pegawai-pegawai Kor SUKSIS

UMS dan UNIMAS dapat menceburkan diri dalam dunia kepolisan dengan menjadikan kerjaya kepolisan sebagai pilihan utama.

"Tuan-tuan dan puan-puan bolehlah memohon untuk menjawat jawatan sebagai Pegawai Kanan Polis berpandukan kepada tawaran pengambilan yang dikeluarkan dari semasa ke semasa.

"Pengalaman menjalani latihan bersama Kor SUKSIS akan menjadi satu kelebihan dalam proses saringan dan temu duga yang dijalankan," ujarnya.

Sementara itu, Timbalan Naib Canselor Hal Ehwal Pelajar dan Alumni UMS, Profesor Madya Dr. Raman Noordin berkata, para pelatih diingatkan untuk sentiasa menjaga nama baik UMS mahupun UNIMAS selepas ditauliahkan.

Turut hadir, Pesuruhjaya Polis Sarawak, Dato' Mohd Azman Ahmad Sapri, Komandan Kor SUKSIS UNIMAS, Profesor Dr. Ahmad Hata Rasit dan Timbalan Komandan Kor SUKSIS UMS, Profesor Madya Dr. Peter Voo Su Kiong.